[15; Zierleiste]

Cartell.

Jason/ Ein Vberwinder der gefehrlichsten Abenthewren/ Ein glückseliger Eroberer des grössesten Schatzes deß Güldenen Flüsses/ ein Triumphirer vber allen Neid/ vnd vornembster Favorit der Weisen vnd Streitbaren Palladis.

An alle Rittermessige vnd Heroysche Hertzen/ die Jhme in Tugend nachfolgend/ gleichmessige Ehr zu erlangen sich bemühen.

DEr Weissagerische güldene Mastbaum/ welcher vnder andern hohen favorn/ die weiße vnd streitbare Pallas, Mir auß sonderlicher zuneigung/ zu desto leichterer volnbringung meiner Argonautischen Impresa, in mein Schiff geschenckt/ hat mir zu derselben glücklichen endschafft angedeutet/ daß bey dieser gegenwertigen Churfürstlichen Heimfarth/ in den Palatinischen Pallästen/ Jch wieder/ eben in der gestalt/ wie Jch im Triumph in mein Vatterland vnd Königreich Thessalia, nach erobertem güldenen Flüß vnd Schatz eingezogen/ Mich præsentiren/ vnd neben zweyen/ den vornembsten auß meinen trewen Gesellen/ welche Mir in meiner Impresa die grösseste assistentz erwiesen/ ein löbliches Ritterspiel vnd Ringelrennen/ zu Ehrn dem Hochlöblichsten Frawenzimmer/ vnd der wehrten anwesenden Ritterschafft publiciren vnd halten werden müssen. Derentwegen vnd dieweil die Mir so hoch erfrewliche vnd lengst erwündschte zeit nunmehr vorhanden/ so hab Jch mich/ auf befelch vnd ordinantz meiner einigen Fürstin vnd Patronin/ der weißen Palladis, mit meinen zweyen getrewen Gesellen/ welche Sie/ die Pallas, Jhrer Trew vnd [16] Tugenden halber/ würdig erkandt vnd selbst erkohren/ auch mit meinem gantzen/ vnd dem Thessalischen triumphirenden Einzug gantz ehnlichen Comitat, anhero begeben/vorhabens/neben Jhnen/wieder alle vnd jede Adventurirer/ so laut deß Ordinari Cartels aufziehen vnd rennen wollen/Ritterlich vnd Mannlich zu mainteniren:

- Daß ohne weisen Rath vnd frewdige vndernehmung/ keine hohe vnd der meinigen gleichende Impresa kan angefangen/ weniger ins werck vnd zu ende gerichtet werden.
- Daß ohne trewe vnd bestendige Liebe/ die Mannheit sich keines glücklichen Sieges zu getrösten.
- 3. Daß eines großmütigen hertzens Erster Sieg an sich selber anfahen muß.
- 4. Daß demselben hernach keine Abenthewer vorkommen kan/ die er nicht zu seinem Lob vnd Ehr zu ende bringe.
- 5. Daß der hohe Schatz/ den Jch in der Newen Colchischen Abenthewer so glücklich erobert/ vber allen werth sey.
- Daß keiner dieses meines eroberten Schatzes Lob/ mehr außzubreiten/ auch desselben mehr würdig sey/ vnd Jhn meritire/ als Jch

lason